

## Tunngaviusunik inatsisiliortunut ileqqoreqqusat

### **I. Tunngaviit nalinginnaasut**

1. Inatsisit tunngaviusussat pillugit Isumalioqatigiissitanut ilaasortaasut, taakkununga ilaallutik immikkut ilaasortaataasut alaatsinaatsullu, isumalioqatigiissitanut suliakkiisutitut najoqqutassiap oqaasertaanik anersaavanillu, kiisalu ileqqoreqqusanik ukuninnga, malinnillutik sulissapput.
2. Isumalioqatigiissitanut ilaasortaaffik inuiaqatigiit sinnerlugit sulineruvoq, taamatullu taakkununga akisussaassuseqartumik sulinerulluni, tassungalu atapput ileqqorissaarnikkut pisussaaffiit annertuut qaffasissullu. Tamanna pillugu ilaasortat tamarmik ataqqinarpaluttumik pisussaaffeqarpalaartumillu sulissapput, taamaammat ilaasortat kikkulluunniit unneqqarillutik naapertuilluarlutillu sulissapput.
3. Tunngaviusunik inatsisiliornermut ilaasortat pisussaaffiat tassaavoq Kalaallit Nunaata inuinit tamanut pitsaanerpaq anguniarlugu sulissallutik.
4. Isumalioqatigiissitanut ilaasortat kimilluunniit sumilluunniillu eqqunngitsumik toqqaannartumik, toqqaannanngitsumilluunniit, sunnerneqaratik suliaassartik isumagissa-vaat.
5. Ilaasortatut ataatsimiinnersiuteqarnerup saniatigut ilaasortat nalinginnaasut avataaneersunik ilaasortaaneersiuteqaratillu tapiiffigineqartartussaangillat, allatigulluunniit sunniiniutitut isigineqarsinnaasunik tigusaqartartussaananatik.
6. Ilaasortat kikkulluunniit inunnik ataasiakkaanik, peqatigiinnilluunniit, aalajangersimasunik qaqugukkulluunniit salliutitsisassanngillat, suliaasaq imminut isumagisassanngortitaasoq arlaatigut atornerlunneqaqqunagu.
7. Ilaasortat arlaannaalluunniit allanut ilaasortaaffeqarnermigut, attuumassuteqarnermigut, oqaaseqaateqarnermigut allatigulluunniit tunngaviusunik inatsisiliortut tutsuiginassusiannik, illuinnaasiunnginnerannik ataqqinassusiannilluunniit navianartorsiortitsissanngilaq.
8. Ilaasortat akunnerminni isumaqatigiipput isumalioqatigiissitat siulittaasuat avammut oqaaseqartartuusoq, taassumalu piginnaatitsineragut siulittaasoq sinnerlugu siulittaasup tullia oqaaseqartartuusassalluni. Isumalioqatigiissitat ataanni ataatsimiititaliat assigisassalu siulittaasui isumalioqatigiissitat siulittaasuat paaseqatigalugu avammut oqaaseqartarsinnaapput.

### **II. Tunngaviusunik inatsisiliortut aalajangiisarneri imaluunniit oqaluserisassanik suliaqartarneri**

9. Tunngaviusunik inatsisiliortunut ilaasortaasut isumalioqatigiissitat ataatsimut aalajangiannik maleruaassapput, aammalu aalajangikkanik tamakkuninnga kikkut tamar-

mik tutsaanni qularutiginnilersitsinikkut isumalioqatigiissitat tutsuiginassusiannik innarliissanatik.

### **III. Paasissutissat isertuussassat**

10. Isumalioqatigiissitat sulineranni suut isertuuttarissat tunngaviusunik inatsisiliortut tigummiaat isertuunneqassapput, aammalu ilaasortap kialluunniit inuttut inuiaqatigiillu akornanni inissisimanermigut iluaqutissarsiornerani atorneqassanatik. Killilersuutit tamakku tunngaviusunik inatsisiliortunut ilaasortap sulinera naammassereeraluarpaluunniit atuutissapput.

### **IV. Najuuttarneq**

11. Tunngaviusunik inatsisiliortunut ilaasortat suliassamik pingaarutilimmik tatigisaallutik suliassinneqarsimapput, aammalu suliassaminnik ilungersorlutik tamatigut naammassinninniassapput, peqquteqavissumik patsiseqanngippat isumalioqatigiissitat ataatsimiinneri tamaasa najuuffigisassavaat, kiisalu pisariaqartitsineq naapertorlugu tamanut ammasumik tusarniaalluni ataatsimiititsinerit ilaaffigisassallugit.

### **V. Maleruaaneq**


12. Maleruagassani ukunani aalajangersakkanik sunilluunniit nalornissuteqartoqartillugu tunngaviusunik inatsisiliortunut ilaasortat isumalioqatigiissitat siulittaasoqarfiannut attaveqartassapput.

### **Atuutilersitsineq**

Ileqqoreqqusat isumalioqatigiissitat 29. august 2019 ileqquusumik ataatsimiinneranni akueri-neqarlutillu atuutilerput.

Nuummi, ulloq 29. august 2019

#### ***Atsiornerit:***




Doris J. Jensen, siulittaasoq



Kuupik V. Kleist, siulittaasup tullia

Nivi Olsen, ilaasortaq



Per Rosing-Petersen, ilaasortaq



Paninguak M. Kruse, ilaasortaq


Paninguak M. Kruse




Aleqa Hammond, ilaasortaq



Anita Hoffer, ilaasortaq



Daniel Thorleifsen, immikkut ilaasortaataq



Rosanguaq Rossen, immikkut ilaasortaataq

/



Johan Lund Olsen,

Allattoqarfimmi pisortaq